

MINORITY SHAREHOLDER WATCHDOG GROUP

BADAN PENGAWAS PEMEGANG SAHAM MINORITI BERHAD

(Incorporated in Malaysia – Company No. 524989-M)

Berita Harian – 10 November, 2014 (A)

Khazanah patut laksana pelan struktur semula MAS



RITA BENOY
BUSHON

Baru-baru ini Mahkamah Rayuan di dalam satu semakan kehakiman mengeluarkan perintah bahawa, Bursa Malaysia tidak mempunyai kuasa mengeluarkan perintah ‘restitusi’ atau pemulihan kepada pengarah syarikat tersebut.

Ia bermaksud pemulihan hak di bawah undang-undang perlu dilakukan melalui proses mahkamah yang sedia ada.

Kami juga mengambil perhatian bahawa Kumpulan Wang Simpanan Pekerja (KWSP) telah mengemukakan rayuan terhadap keputusan Bursa Malaysia untuk tidak membenarkan dana pencairan itu mengundi dalam cadangan penggabungan membabitkan RHB Capital Bhd, CIMB Group Bhd dan Malaysia Building Society Bhd (MBSB).

Ada hak kemuka rayuan

Pendirian kami kekal konsisten, iaitu kami percaya Bursa Malaysia telah meneliti merit permohonan berkenaan dalam memutuskan keputusan itu, kerana membenarkan KWSP mengundi akan beranggah dengan Keperluan Penyenaraian Bursa Malaysia sendiri.

Ia juga boleh mengakibatkan semua institusi lain memohon pengecualian pada masa depan.

Bagaimanapun, KWSP mempunyai hak untuk mengemukakan

sebarang rayuan dan Bursa Malaysia mempunyai tanggungjawab untuk mempertimbangkan rayuan berkenaan.

Sehingga itu, kita harus menunggu dan melihat sama ada terdapat bukti baharu untuk meyakinkan pihak kawal selia bahawa KWSP patut diberikan pengecualian dan dibenarkan mengundi.

Pada minggu lalu, MSWG mengadakan dua forum untuk membincangkan beberapa isu yang dibangkitkan oleh pemegang saham minoriti mengenai cadangan penggabungan RHB-CIMB-MBSB dan cadangan pengambilalihan OSK Property dan PJ Development oleh OSK Holdings.

Kedua-dua forum terbabit dihadiri oleh ramai peserta dan menjadi satu platform pertukaran maklumat dan idea yang berkesan.

Ia juga telah memberikan peserta pemahaman yang lebih

mendalam mengenai pelbagai isu penggabungan dan pengambilalihan serta penswastaan syarikat.

Resolusi disokong

Pada minggu lalu, Penerbangan Malaysia (MAS) mengadakan mesyuarat agung luar biasa (EGM) untuk memohon kelulusan pemegang saham tidak berkepentingan bagi penswastaan syarikat penerbangan nasional itu menerusi cadangan pengurangan dan pembayaran balik modal secara terpilih (SCR). Ia bagi membuka jalan pelaksanaan penstrukturran semula syarikat yang komprehensif oleh Khazanah Nasional Bhd.

Resolusi berkenaan disokong oleh 93.98 peratus pemegang saham tidak berkepentingan (dari segi nilai) dan 70.6 peratus dari segi bilangan undi, manakala 1.41 peratus telah menolak tawaran terbabit.

Ramai pemegang saham yang saban tahun menyokong MAS berasa marah dan kecewa memandangkan Khazanah mempunyai ramai bakat terbaik serta perunding dan penasihat yang terama, namun masih gagal untuk menyelamatkan MAS.

Pemegang saham minoriti terpaksa memilih penswastaan syarikat pada harga tawaran dalam EGM itu.

MAS kini telah diswastakan dan kami percaya Khazanah mempunyai tanggungjawab lebih berat untuk terus telus memandangkan MAS adalah aset rakyat.

Oleh itu, kami berharap Khazanah akan melaksanakan pelan penstrukturran semula seperti yang diumumkan dan memberikan keputusan yang dihajati.



ialah Ketua Eksekutif Badan Pengawas Pemegang Saham Minoriti (MSWG)